

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ZAKON**

**O IZMJENAMA I DOPUNAMA ZAKONA O JEDINSTVENOM SISTEMU  
REGISTRACIJE, KONTROLE I NAPLATE DOPRINOSA**

**Sarajevo, novembar 2013. godine**

## **PRIJEDLOG ZA DONOŠENJE ZAKONA PO HITNOM POSTUPKU**

Donošenjem ovog Zakona po hitnoj proceduri stvaraju se pretpostavke za jačanje discipline u oblasti doprinosa i podnošenja prijava (prijave i odjave osiguranja kao i promjene u toku osiguranja) u Jedinstveni sistem registracije, kontrole i naplate doprinosa, smanjenje troškova u Poreznoj upravi Federacije Bosne i Hercegovine u vezi sa bespotrebnim izdavanjem uvjerenja iz Jedinstvenog sistema registracije kontrole i naplate doprinosa, svim osiguranicima iz osnova radnog odnosa, kao i znatne uštede u budžetu Federacije Bosne i Hercegovine u narednim godinama. Shodno navedenom smatramo da su ispunjeni uslovi iz člana 186. Poslovnika o radu Doma naroda Federacije BiH i člana 191. Poslovnika Predstavničkog doma Parlamenta Federacije BiH.

**ZAKON  
O IZMJENAMA I DOPUNAMA ZAKONA O JEDINSTVENOM SISTEMU  
REGISTRACIJE, KONTROLE I NAPLATE DOPRINOSA**

Član 1.

U Zakonu o Jedinstvenom sistemu registracije, kontrole i naplate doprinosa („Službene novine Federacije BiH“, br. 42/09 i 109/12), u članu 18. u stavu 1., riječi: „svakom osiguraniku“ zamjenjuju se riječima: „na zahtjev osiguranika“.

Stav 2. mijenja se i glasi:

„Uvjerenje iz stava 1. ovog člana dostavlja se najkasnije do 31. decembra tekuće godine.“

Stav 3. se briše.

Član 2.

U članu 30. u stavu 1. broj „500,00“ zamjenjuje se brojem „1.000,00“.

U stavu 3. broj „200“ zamjenjuje se brojem „700“.

Član 3.

U članu 31. u stavu 1. broj „200,00“ zamjenjuje se brojem „700,00“.

Član 4.

Ovaj Zakon stupa na snagu narednog dana od dana objavljivanja u „Službenim novinama Federacije BiH“.

# O B R A Z L O Ž E N J E

## I. USTAVNI OSNOV

Ustavni osnov za donošenje Zakona o izmjenama i dopunama Zakona o Jedinostvenom sistemu registracije, kontrole i naplate doprinosa je u članu III. 1. tačka c. koji je izmijenjen amandmanima VIII, LXXXIX i CVI i članu IV. A 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donošenje propisa o finansijama, a Parlament Federacije BiH uz ostala ovlaštenja predviđena Ustavom, odgovoran je za donošenje zakona o vršenju dužnosti u federalnoj vlasti.

## II. RAZLOZI ZA DONOŠENJE ZAKONA

Osnovni razlozi za donošenje Zakona su:

Izdavanjem uvjerenja, koje sadrži godišnje podatke o iznosu uplaćenih, odnosno neuplaćenih doprinosa, samo na osnovu zahtjeva osiguranika iz osnova radnog odnosa smanjit će se bespotrebno angažovanje zaposlenika i troškovi Porezne uprave jer se ista neće izdavati licima kojima nisu potrebna. Porezna uprava je planirala, nakon implementacije Zakona o elektronskom dokumentu, poduzeti aktivnosti oko realizacije web servisa za osiguranike, koji će putem interneta moći da ostvare uvid u stanje uplaćenih doprinosa po osnovu radnog odnosa kod poslodavca i da iste odštampaju u vidu uvjerenja. Navedena uvjerenja za 2011. godinu, u toku 2012. i 2013. godine, Porezna uprava je izdavala na osnovu zahtjeva osiguranika i prvi put, do kraja 2013. godine, je trebala izdati svim osiguranicima za 2012. godinu. Sredstva za pokriće troškova izdavanja uvjerenja svim osiguranicima iz osnova radnog odnosa nisu odobrena u Budžetu za 2013. godinu, a primjenom važeće odredbe Zakona bilo bi potrebno svake naredne godine planirati značajna sredstva po ovom osnovu u budžetu Federacije BiH. Povećavanjem iznosa minimalnih propisanih kazni za obveznike uplate doprinosa stvaraju se pretpostavke za jačanje discipline u oblasti prijavljivanja zaposlenika na obavezna socijalna osiguranja kao i promjena u toku samog osiguranja kao i smanjenja „rada na crno“.

## III. OBRAZLOŽENJE POJEDINIH ODREDBI

### Član 1. (član 18. Zakona)

Izmjenom se definira da će Porezna uprava Federacije BiH svakom osiguraniku iz osnova radnog odnosa izdavati, na osnovu zahtjeva, uvjerenje iz Jedinostvenog sistema koje sadrži godišnje podatke o iznosu uplaćenih, odnosno neuplaćenih doprinosa, a ostalim osiguranicima kojim je isto nepotrebno se neće ni izdavati.

### Član 2. i 3. (član 30. i 31. Zakona)

Izmjenom članova se povećava iznos minimalne propisane novčane kazne.

## IV. FINANSIJSKA SREDSTVA

Za donošenje ovog Zakona nisu potrebna dodatna finansijska sredstva iz budžeta.

**ZAKON O JEDINSTVENOM SISTEMU REGISTRACIJE, KONTROLE I NAPLATE  
DOPRINOSA („Službene novine Federacije BiH“, br. 42/09 i 109/12)**

**Tekst odredbi koje se mijenjaju**

Član 18.

Porezna uprava svakom osiguraniku iz osnova radnog odnosa izdaje uvjerenje iz Jedinostvenog sistema koje sadrži godišnje podatke o iznosu uplaćenih, odnosno neuplaćenih doprinosa.

Uvjerenje iz stava 1. ovog člana dostavlja se za svaku fiskalnu godinu najkasnije do 31. decembra tekuće godine za prethodnu fiskalnu godinu.

Izuzetno u 2012. godini, uvjerenje iz stava 1. ovog člana za 2011. godinu, Porezna uprava izdaje na osnovu zahtjeva osiguranika.

VII. KAZNENE ODREDBE

Član 30.

Novčanom kaznom u iznosu od 500,00 KM do 50.000,00 KM kaznit će se obveznik uplate doprinosa za prekršaj ako:

- 1) ne podnese prijave osiguranja, odjave osiguranja i prijave promjene u toku osiguranja (član 12.);
- 2) unese netačne podatke u prijave za upis u Jedinostveni sistem (član 12.);
- 3) podnese prijave osiguranja, odjave osiguranja ili prijave promjena u toku osiguranja po isteku propisanog roka (član 14.).

Za prekršaj iz stava 1. ovog člana kaznit će se odgovorno lice u pravnom licu novčanom kaznom u iznosu od 500,00 KM do 3.000,00 KM.

Za prekršaj iz stava 1. ovog člana kaznit će se fizičko lice - poduzetnik novčanom kaznom u iznosu od 200,00 KM do 1.500,00 KM.

Pored novčane kazne počiniocu prekršaja iz stava 1. ovog člana može se izreći i zabrana vršenja djelatnosti u periodu do šest mjeseci s ciljem sprečavanja budućeg činjenja prekršaja.

Član 31.

Novčanom kaznom u iznosu od 200,00 KM do 1.500,00 KM kaznit će se za prekršaj osiguranik koji je sam za sebe obveznik uplate doprinosa ako:

- 1) ne podnese prijavu na osiguranje ili je podnese po isteku propisanog roka (čl. 12., 14. i 15.);

2) ne podnese prijavu o prestanku osiguranja ili je podnese po isteku propisanog roka (čl. 12., 14. i 15.);

3) ne podnese prijavu o promjeni osiguranja ili je podnese po isteku propisanog roka (čl.12., 14. i 15.);

4) u roku koji je odredila Porezna uprava ne otkloni netačne podatke unesene u prijavu za upis u Jedinstveni sistem (član 17.).

Dobrovoljni obveznik uplate doprinosa ne podliježe plaćanju novčane kazne propisane ovim članom.